

USS DR GSCHICHT VOM VERCHEERS- +VERSCHÖNERIGSVEREIN MÜNGGESCHTEI.

En erschte Dail:

RUND UM DR VORSCHTAND

Mini Daamen und Heere,
Gäscht, Fründ und Vereinsmitgliider,

Won i dr Uffdraag übernoo ha, in dr Gschicht vom ene **100 jöörige Verein**, vom Vercheers- + Verschönerigsverein Münggeschtei z grüeble, han i sicher nit dra dänkt, was für en Uffwand an Zyt, und vor allem Geduld ass es do drzue brucht.

I ha d Sytte nit zellt, wo s z lääse gee hett, und die underschiidlige Schrifte, wo die divärsen Protokollfierer gschriibe hänn, hett dr ganzi Uffwand au nit eifacher gmacht.
Ass mer s Dorli Pfeuti - Lauber **die** Protokoll, wo in dr alte dütsche Schrift vorglääge sinn, bearbeitet hett, do drfür bin i froo gsi und saag em härzlige Dangg.

s Positiven an däären Arbeit, emmel für mi, isch gsi:
Me hett sech plötzlich an Nääme, an Menschen bsunne, wo scho lang nümmen under uns sinn.
By mir sinn Erinnerigen an e Zyylete Lèèrer und drmit au Begäabeheite mit ene fürechoo.

- Me liist vo Hüüser, vo Wääg und Egge, wo hütte nümmen exischiere.

- Men erfaart Sache, wo hütte sälbverschändlig sinn, in dr früejere Zyt aber hart hänn miessen erkämpft wärde.

So, jetz wänn mer zämme loose, was sech rund um dr Vorschtand umme do hett und wänn au luege, wie viil Präsidänten ass dä Verein prägt hänn.

1906 Im Spootjoor

1906 hett dr Freisinnig Gmeiniverein, öb das dr Vorgänger vo dr FDP gsi isch, liist me niene, veraalasst, me söll sech doch e mool Gedangge mache, e Vercheers- und Verschönerigsverein z gründe.
E Gruppe Lütt hänn dä Gedanggen uffgnoo, hänn in andere Dörfer ummegfrot und gsee, ass das öppis Guets wär.
Si hänn sech Stadute beschafft und hänn mit däre Grundlaag an e Gründig chönne dänke. Ass es allwäg einiges an Arbet gee wird, hänn si by dääne Kondaktnaam chönne erfaare.

23.11.06 Dr erschi Vorschand isch beruefe worde.

Zum Präsidiänt: Dr Pfaarer Wilhelm Burckhardt.

Äär isch scho Gründer vom Chrankeplägverein Münggeschtei gsi und zue däm Präsidiänt vo dr Basler Missionsgesellschaft, also e bekannte Maa.

Zum Vice: e Hans Werder

zum Kassier: Ärnst Horisberger

zum Aktuar: Dr Lèèerer Wilhelm Erb

und drzue no 3 Biisitzer.

Me hett d Statute bereiniget.

07.03.07 Isch en erscht Vorstandsitzig gsi und bereits sinn do die gröschte Schwiirigkeiten uffträtte, denn es sinn d Demissionen vom Präsidiänt, wäge Arbetsüberlaschtig und vom ene Bisitzer, ohni Gründ, vorglääge und das ei Wuche vor dr erschte Generalversammlig.

16.03.07 Das isch s Datum vo dr **offizielle Gründig vom VVM** und die hett hütten uff dr Daag genau vor **100 Joor** stattgfunde.

Dr Präsidiänt, dr Pfarrer Burckhardt, hett me chönne zum Wytersmache gwünne und dodmit isch dr Vorschand handligsfäähig gsi.

Es sinn divärsi Aadrääg zur Bearbeitig aagnoo worde.

Me hett über Orientierigsdafele, Wäägwyyser und Rueibänkli diskudiert.

Übrigens,

Die Aalaage sinn über die ganze 100 Joor e Duurbrenner gsi.

Aber göön mer jetz witter und luege, wär alls uff däre Präsidiäntelische stoot.

1907 – 1911 Pfaarer. W. Burckhardt 4 Joor

3. 5.11 An däre Vorschandsitzig sinn numme 4 Demissionsschriibe vorglääge: Vom Präsidiänt, Vice-Präsidiänt, Kassier und Aktuar. Gründ sinn keini aagee. Was isch ächt do passiert?

24. 6.11 Hett en usserordentligi Generalversammlig stattgfunde. Im ene ordentlige Waalverfaare hett men als Präsidiänt dr Otto Schmucki, Diräkter vo de BBC Münggeschtei gwäält. D Versammlig hett denn beschlosse, dr Räschte vom Vorschand, dr Präsidiänt und die 3 Biisitzer solle sälber luege, wär si chönnte bruuche und sich denn Konschituieren.

17. 8.11 erkläart dr Otto Schmucki, äär nääm's Präsidium nit aa! Was mache?

Me bestimmt

zum Präsidänt dr Lèerer August Hägler

zum Vice e Heer Matter

zum Kassier e Heer Lindemaa und

zum Aktuar dr Lèerer Fridolin Müller.

29. 8.11 Dr Fridolin Müller erkläart: äär miech in däm Vorschtand nit mit!

Ass me doch no an e Ziil chunnt, dritt dr Lèerer Hägler als Präsidänt zrugg

und übernimmt dr Poschte vom Aktuar. Äär präsentiert au e neuie

Präsidänt, dr Fritz Müller - Graf.

Dä übernimmt das Amt und dr Vorschtand isch ändlig wiider handligsfääig.

1911 - 1914 Fritz Müller - Graf 3 Joor

1913 Dr August Hägler demissioniert als Aktuar und si Poschten übernimmt dr Edi Mannok.

1914 - 1917 Edi Mannok 3 Joor

1914 Dr Fritz Müller gitt sy Amt ab und dr Edi Mannok wird Präsidänt.

In däre Zyt isch dr Dokter Löliger Aktuar und während siner Zyt stöön im Protokoll numme d Draktandelische.

Nienen stoot öppis über d Gschäft, wo me behandelt hett und au nienen isch erwäänt, dass wägenem Aktivdienst kei Generalversammlig stattgfunde hett.

1917 - 1921 A. Sutter 4 Joor

1917 A. Sutter wird Präsidänt, Walter Müller - Maurer Vice und Fridolin Müller neue Aktuar.

1921 - 1930 Fridolin Müller 9 Joor

1921 Dr Fridolin Müller wird neue Präsident und amtet wäred 9 Joor.

Zwüscheniine hett er zwar emool e Wiiderwaal abgläänt aber trotzdem witters gmacht.

1930 - 1938 Wilhelm Zoller 8 Joor

1930 als Präsidänt gwäält wird dr Wilhelm Zoller.

1938 - 1947 Robert Huber 9 Joor

1938 isch dr Robert Hueber Präsidant worde.
An dr GV 1939 hett men em Vorstand e Gratifikation, so hett me gseit,
vo Fr. 100.- usszaalt.
1943 isch dr Gärtnermeischer Stettler Aktuar worden
und während 22 Joor blibe.

1947 - 1954 Emil Kopp 9 Joor

1947 Emil Kopp wird neue Präsidant
1950 findet me die erschti Mäldig über dr Mitgliederbeschand:
226 Personen.
1951 Diskussion wägen em 1. August: „Mer chönne nie druf verzichte“
1953 sinn ganzi 13 Mitglieder an dr GV (inkl. Vorschtand)
1954 an dääre GV wird verzellt, es gäb so vorwitzigi Lütt, wo die uffbaarte
Lyyche geeche go aaluege.

1954 - 1963 Karl Leupin 7 Joor

1954 Dr Léerer Karl Leupin wird zum Präsidant gwäält.
Wenn y ammigs bi den einzelne Präsidante nütt speziells due erwääne, so
isch das nit, will si nütt gmacht hei, sondern will sech d Arbeite wiiderhoolt.

1963 – 1995 Karl Wagner 32 Joor

1963 Jetzt foot e langi Präsidialzyt aa.
Dr Karl Wagner wird gwäält und es isch en aktivi Zyt, won äär präsidiert.
S wichtigscht Ereignis für Yyn isch in sym letschte Joor passiert.
1995 het yyn e Vereinsmitglied, e Polizischt aazeigt, will s Fasnachtsfüür nit in
Ornig gsi sig. Dä Maa hett feschtgschtellt, ass es im uffgschichtete
Holzschoos Palette gha hei, wo nit sauber gsi siige.
Dr Gmeinpräsidant, dr Umwältverantwortlichi uff dr Gmein und d Füürweer
hänn miesse beschätige. ass es sich um suuberi Eiwägpalette ghandlet
heb. D Aazeig isch mit Choschtefolg für dr Staat abgwiiße worde. S Mitglied
hett d Konsequänze zogen und isch usstrate.
Wien i festgschtellt ha, isch das für der VVVM die einzigi Erfaarig mit dr
Polizei und de Gricht in de vergangene 90 Joor gsi.
Übrigens: D Präsidialzyt vom Karl Wagner hett für dr Verein non e
bsunderen Aschpäck gha. Sitt dörte sinn au Fraue in dä erlauchti
Vorschtandskreis uffgnoo worde.
D Erna Loeliger hett als Sekretärin die glyychi Amtszyt gha,
wie dr Präsidant.

1995 - 1999 Hanspeter Brühlhard 4 Joor

1995 Neue Präsident isch dr Hanspeter Brühlhard worde.

1999 - 2000 Martin Schwaiger 2 Joor ad. int.

1999 Will in dr Vereinsgeschichte vo de letschte Joor einiges im Aarge gsi isch, hett der Martin Schwaiger s Präsidium für 2 Joor ad interim gfüert.

2000 - 2008 Heidi Schwaiger 8 Joor

2000 Sitt do stellt dr Martin si Frau als Präsidentin zur Verfügung und si macht iire Job ussgezeichnet und so wie dr Schriiber die Sach aaluegt, wird si au no witteri Joor in unserem Schiffli ruedere.

Im Gsamte sinn in däne 100 Joor **12 Präsidenten und 1 Präsidentin** am Wärc h gsi.

das miecht eigentlich e durchschnittligi Amtszyt vo **7,69 Joor**.

Die langi Präsidialzyt vom Karl Wagner bringt aber e Durchschnitt vo **5,66 Joor**.

Aber luege mir jetz no aa, was in däne Joor vom Vorstand alles an ordentlicher Arbeit gleichtet worden isch.

In däre Zytt sinn

99 Generalversammlige

3 usserordentligi Generalversammlige,

11 Vorschtandsitzige

35 Kontrollgäng und Augeschyn,

7 Delegierteversammlige,

5 Sitzige vo Spezialkommissionen bsuecht worde.

Das gitt zämme 359 Vorschtandsaaläss. Rächne mir pro Aalass e Durchschnitt vo numme 2 Stund, denn gitt das 718 Stund oder 29,9 Dääg à 24 Stund.

Die Zytt, wo s brucht hett, zum die eigentligi Arbeit zmache, cho me gar nit ermittle.

Vergässe han i no die verschiedene Vereinsreise, wo meischens im Protokoll gar nit vermerkt worde sinn.

So, jetz hoff i, yyr siget mit däm Ruggblig uff ei Dail vo dr Vereinsarbeit zfriide und chönnet jetz zur Entschpannig e wittere Programmpunkt gniesse!

Das sind die Schlussworte in Mundart vorgetragen von Huggel Benjamin an der 100 Joor GV im Jahr 2007.

Ab jetzt wird das Journal vom Amtierenden Präsidenten geführt.

Im Jahr 2016 ist das Dokument veröffentlicht worden auf der Webseite des VVM.

2008 - 2014 Martin Schwaiger 6 Joor

2008 Heidi Schwaiger hett gnueg und gitt z'Präsidium wider am Martin, irem Maa. Dr Martin Schwaiger isch ä Schaffer und macht viil im Hintergrund für dr VVM. Dr Martin het an viilem Inträsse, drum will er im 2014 us em Vorstand zrügg träte.

2014 - 2015 Hansueli Rolli, Hans Kunz 1 Joor

2014 niemmer will z'Präsidium übernää. Hansueli Rolli isch bereit mit Hans Kunz als Co Präsidente z'amte.

2015 - 2019 Hansueli Rolli 4 Joor

2015 Hansueli Rolli wird an dr GV als Präsident gwäält
 Vice-Präsidente wird Sandra Zimmermann Eintopfen
 Übige Vorstandsmitglieder:
 Hans Kunz Kassier
 Jürg Marti Protokoll
 Robi Dürrenberger Feldgottesdienst

2016 Hansueli Rolli stellt sich als Präsident zur verfüegig und wird für wiiteri 3 Joor gwäält.

2019 Hansueli Rolli tritt als Präsident zrügg.

2019 - Präsidentrat wird für 3 Joor gwäält,
 Jürg Marti, Vorsitz
 Sandra Zimmermann, Stellvertretung
 Hans Kunz, Kassier und Post-Adresse: im Hintenaus 12,
 4142 Münchenstein

Der Präsidentrat nimmt die Funktion des Präsidenten wahr.
 Alle Mitglieder des Präsidentrats sind gleichberechtigt.
 Sie unterzeichnen immer mit zwei Unterschriften.